

**INKULUMO KANGQONGQOSHE WEZOKUTHUTHA, UKUPHEPHA
NOKUXHUMANISA UMPHAKATHI KWAZULU-NATAL UMNUZ WILLIES
MCHUNU EMCIMBINI WOKWETHULA UHLELO LUKA-OPERATION
HLASELA E-NEWLANDS MHLAKA 26 NOVEMBER 2011**

Mphathi Wohlelo

Amalungu eSishayamthetho

Ubuholi bezepolitiki namaKhansela aseThekwini

Abaholi bezenkolo

Abamele izinhlaka ezahlukene zomphakathi abakhona

Abamele amaqembu epolitiki;

Abamele izinhlangano zabasebenzi;

Abamele osomabhezini;

Izimenywa ezahlukene;

Bafowethu nodadewethu

Mangithathe leli thuba nginamukele nonke nonke enikwazile ukuphumelela kulo mhlango obaluleke kangaka wokulwa nobugebengu. Kimina ukuba khona kwenu lapha kutshengisa ukuzimisela kwenu ekwenzeni le ndawo ibe ngephephile nenempumelelo.

Usuku lwanamhlanje ngolokwabelana ngemibono, sixoxisane bese siqhamuka nezisombululo ezizosisiza sonke.

Siyazi ukuthi uHulumeni wamanje ukulwa nobugebengu kubekwe eqhulwini kanye nezinye izinhlelo ezibalulekile njengezempilo, ezemfundo, ukulwa nobubha, ukuthuthukiswa kwezindawo zasemakhaya nokwakhiwa kwamathuba emisebenzi esezingeni elifanele.

Ukuze sifeze lokhu, kunesidingo sokuthi siqhamuke nezindlela zokulwa nobugebengu lapho sididiyela ndawonye umkhakha wokunqanda ubugebengu, ukwenza ngcono izimo zenhlalo-mnotho nokuqinisa ubumbano lwezakhamizi.

Muningqi-ke umsebenzi osuwenziwe ukuzama ukuqonda izinto ezahlukene eziholela ezingeni lobugebengu esibubonayo ezindaweni zethu namhlanje. Ngenxa yezinselelo zobugebengu ezibhekene neKwaZulu-Natal, uHulumeni walesi fundazwe uholo umbimbi lokulwa nobugebengu esithi 'Build A United Front Against Crime'.

Ngalolu hlelo sinxusa ukuthi zonke izinhlaka zomphakathi zihlanganyele ndawonye embhidlangweni oqhubekayo wokunciphisa izinga lobugebengu esifundazweni obizwa ngo'Operation Hlasela'.

Sithi njengoHulumeni, abaholi bomphakathi ezinhlakeni ezahlukene nanjengamalungu omphakathi, kumele sithathe indawo yethu, sisebenzisane ndawonye ekutholeni izixazululo ezinkingeni zokuphepha esinazo neziphazamisa inhlalakahle yabantu bakithi.

Sesike sabafika nakomakhelwane benu kule ndawo ebizwa nge-INK – Inanda, Ntuzuma, KwaMashu – kulandela izibalo zobugebengu ezazikhishwe ngo-2009/2010 nemibiko yabezindaba okwakukhombisa ukuthi izakhamuzi sezikhungethwe ukwesaba ngenxa yezigameko zobugebengu kuleya ndawo.

Sekungumlando-ke manje ukuthi izibalo zobugebengu kusuka mhlala 1 April 2010 kuya ku-31 March 2011 ziveze ukuthi KwaMashu kube nokwehla okukhulu kokubulalwa kwabantu kusuka ku-235 ngonyaka owandulele kuya ku-78 kulo mbiko wakamuva.

Siyakholwa-ke ukuthi ukungenelela okunjengalokhu esikwenzayo lapha namhlanje, kube nesandla esikhulu kuloku kwehla kwezibalo. Namanje sisabonga nje kubo bonke ababambe iqhaza basebenzisana nathi ekulweni nobugebengu kuleya ndawo.

Ngeshwa, indawo yaseNewlands nayo isike yaba sezindabeni muva nje ngezigameko ezishaqisayo ezenzeka khona, kuhlanganisa ukubulawa kwabantu, ukudunwa kwezimoto, ukushiswa komuzi nokusetshenziswa kwezidakamizwa.

Yingakho-ke namhlanje sithanda ukubonga i-Newlands Community Policing Forum, ngokubambisana nezinye izinhlaka zendawo okubalwa nezishosovu ze-SACP, bonke asebehelele ukufuqa lempi yokulwa nobugegengu.

NjengoMnyango wezokuPhepha nokuXhumanisa uMphakathi esifundazweni, siyazibophezela ukuthi sizonisiza ngako konke ekuhlonzeni nasekubhekaneni ngqo nazo zonke izinselelo zobugebengu obuhlasele kule ndawo. Asiyi ndawo size sikhuculule bonke ubugebengu nabenzi babo kule ndawo yase-Newlands.

Ukuze sifeze kahle injongo yomhlangano wanamhlanje, silindele ukuthi nisishele ukuthi yini enizimisele ngokuyenza ukuze siqobe le mpi ngokubambisana. Kasizile ukuzobalula ukuthi yiliphi iqhaza elizobanjwa uhlaka nohlaka olumelwe lapha, kodwa silindele ukuthi yilowo nalowo kuninina uzoqhamuka nombono ozosetshenziswa ukwelekelela le ndawo ekutholeni ukuthula nokuphepha okufanele.

Kodwa engithanda ukukugcizelela namhlanje ngokuthi, ngokubona ukuthi kwesinye isikhathi siyaye sizwe ngoba sekonakele kakhulu, mhlambe sekufe abantu ngaphambi kokuba singenelele, sesibeke amathimba oMnyango wezokuPhepha nokuXhumana koMphakathi asebenza ngokweziFunda eziyishumi kanye ne-Metro yaseThekwini lapha KwaZulu-Natal.

Lamathimba ayizindlebe, amehlo, izandla nezinyawo zoMnyango lapho ekhona. Yiwo asisiza ukuqhuba imikhankaso yokulwa nobugebengu eduze kwabantu lapho behlala khona. Asiza ekutheni sisebenze kalula eduzane nomasipala.

Ngithatha leli thuba ukuthi njengoba kuqhubeka ukungenelela kwethu njengoMnyango ekulweni nobugebengu nokusindisa izimpilo zabantu, kumele nginikhumbuze ukuthi uHulumeni wesifundazwe usembhidlangweni wokuvuselela onembeza kubantu bakithi.

Sithi abantu mabakhulume nonembeza babo noma besebenzisa umgwaqo noma beziqhubela impilo yabo yemihla ngemihla. Sithi njengoba sekuyisikhathi sikaKhisimusi nje, abantu mabangaziphathi sengathi akuseyophinde kube nomunye uKhisimusi.

Ngakho-ke sibe sesethula umkhankaso wethu esiwubiza ngo-Operation Val'ingozi. Kulo mkhankaso umyalezo wethu ucace kahle uthi: **'Khuluma nonembeza wakho, ungawephuli umthetho, ungabulali abantu'**. Lapha sikhuluma nabasebenzisi bomgwaqo kanye nezigebe nguqobo.

Ngemuva kokuwethula eThekwini phambilini kule nyanga, sibe sesithatha isinqumo sokuwusabalalisa kuzo zonke izinhlaka esisebenzisana nazo lapho sihamba khona, sikhuthaze ukuba kubanjiswane ekuvaleni izingozi noma ngabe ezaluphi uhlobo.

Lo mhlango-ke nawo usube yinkundla yokuba siwuse phambili lo mkhankaso njengoba sihlange sibe siqhamuka ezinhlakeni ezahlukene. Lokhu kusho ukuthi njengoba sizobe sixoxa sabelana ngemibono, kuzomele siqhamuke nezindlela ezizolekelela lo mkhankaso ukuba uye phambili.

Okunye futhi esikushoyo ngalo mkhankaso ngukuthi imiphakathi mayisebenzisane namaphoyisa ekulweni nobugebengu bese iyawavikela futhi nawo amaphoyisa akithi. Masiwasindise amaphoyisa – okungabavikeli bethu - ngokuthi sikhulume uma sinolwazi ngetulo lokubulawa kwephoyisa.

Masisebenzisane nezinhlaka zokuphepha emiphakathini njengama-Community Policing Forum (CPF) namakomiti emigwaqo lapho sihlala khona. Masiqaphele ukungazithatheli umthetho ezandleni zethu, kodwa asibabike emaphoyiseni abephula umthetho, abahlukumeza umphakathi, abesifazane, izingane, abantu abadala nabakhubazekile emiphakathini yethu.

Uma kukhona abazakhela amaqembu okulwa nobugebengu, kumele baxhumane nethimba loMnyango esengilethulile ukuze ukusebenza kwabo kungaphambani nomthetho.

Sengiphetha, lapha sihlaba ikhwela lokuba sibambisane ekuqhamukeni namasu amasha nokuzibophezela.

Ukuze lokhu kuphumelele, kumele zonke izinhlaka zomphakathi zisebenzisane ukulwa nobugebengu. Indlela esiphendula ngayo ebugebengwini ingaba yimpumelelo kuphela uma singahlanganisa futhi sisebenzise zonke izinsiza esinazo ukubhekana nezinseselelo esibhekene nazo.

Okubaluleke kakhulu, umuntu ngamunye, imindeni nemiphakathi kumele ibambe iqhaza kakhulu ekwakheni uhlobo lomphakathi esifuna ukuphila kuwo size sikudlulisele isizukulwane esizayo.

Ngakho-ke, ngaphezu kwakho konke lokhu esikusho namhlanje, ngicela nikhumbule ukuthi lolu hlelo ngolwabantu. Luzophumelela kuphela uma nizibophezela. Thina sesibheke ukuzwa ngani ukuthi yiliphi iqhaza enizolibamba ekuletheni ukuthula noxolo kule ndawo.

Ngiyabonga